

ՀԱՅ ԱԻԵՏԱՐԱՆԱԿԱՆ ԲԵԹԷԼ ԵԿԵՂԵՑԻԻ ԱՄԱՌՆԱՅԻՆ ՍՈՒՐԲ ԳՐՈՑ ՎԱՐԺԱՐԱՆ

*«Թող տուէք այդ մանր տղոցը որ ինձի գան եւ մի՛ արգիլէք աստոնք, վասնզի
Աստուծոյ թագաւորութիւնը այսպիսիներունն է»: (Ղուկ. 18:16)*

Պատմութեան ընթացքին, բոլոր եկեղեցիները իրենց մտածողութեան ու
մտահոգութեան, դաստիարակութեան ու անտարանչութեան մէջ
առաջնահերթ տեղ վերապահեցին մանուկին, զինք նկատելով եկեղեցիին
հիմքը եւ ընկերութեան շարունակականութիւնը ապահովող ու ապագան
երաշխաւորող հիմնական տարրը:

Հայ Աւետարանական Բեթել եկեղեցիի Հովիւ՝ Վեր. Յարութիւն Սելիմեանի
հովանաւորութիւնը վայելող Ամառնային Ս. Գրոց վարժարանը տեղի
ունեցաւ 1 Յուլիս - 2 Օգոստոս, 2013, Հայ Աւետարանական Բեթել
Եկեղեցիի Քրիստոնէական Դաստիարակութեան Կեդրոնին մէջ:
Ամառնային Ս. Գրոց Վարժարանի նպատակն է՝ մանուկներուն փոխանցել
Աստուծոյ մեծ սիրոյն, զօրութեան, ողորմութեան, ստեղծագործութեան,
հրաշալի գործերուն եւ յաւիտենական խոստումներուն մասին:
Փոքրիկներուն փոխանցուեցաւ հիմնական ճշմարտութիւններ
քրիստոնէական կեանքի ու կենցաղի մասին:

Ամառնային Ս. Գրոց վարժարան յաճախեցին 150 փոքրիկներ (4-12)
տարեկան, որոնք ամէն օր (Երկուշաբթի-Ուրբաթ) առաւօտեան ժամը՝ 9:00-

1:00, մեծ խանդավառությամբ կը հաւաքուէին, ունենալու առօրեայ յայտագիր, որը կ'ընդգրկէր՝ փառաբանութեան պաշտամունք, հայերէն լեզուի, Անգլերէն լեզուի, Արաբերէն եւ Ֆրանսերէն լեզուներու ուսուցում, Հայոց պատմութիւն, Սբ. Գրային շարունակական պատմութիւն, ազգային եւ հոգեւոր երգեր, ընդհանուր զարգացման նիւթեր, խմբային խաղեր, ձեռնային աշխատանք եւ տեսաերիզի ցուցադրութիւններ:



Ամառնային Ս. Գրոց վարժարանի տնօրինութիւնը վստահուած էր՝ Տիկ. Շողակաթ Սելիմեանին, որուն կողքին իրենց ծառայութիւնը մատուցին 28 ուսուցիչ-ուսուցչուհիներ: Այս տարուան իբրեւ հոգեւոր նիւթ ընտրած էինք՝ Ղուկաս 11:1, «Տէ՛ր, Մեզի Աղօթք ընել Սորվեցուր»: Մանուկներ հինգ շաբթուան ընթացքին անդրադարձան տասը նիւթերու ընդմէջէն թէ՛

1. Աղօթքը՝ Աստուծոյ հետ կապի մէջ մնալու միջոց է:

2. Աղօթքը՝ զԱստուած փառաբանելու եւ շնորհակալութիւն յայտնելու միջոց է:
3. Աղօթքը՝ մեր մեղքերը խոստովանելու եւ Աստուծմէ ներում խնդրելու միջոց է:
4. Աղօթքը՝ մեր խնդրանքներն ու կարիքները ներկայացնելու միջոց է Հօր Աստուծոյ:
5. Աստուած միշտ չի պատասխաներ մեր աղօթքներուն, սակայն երբ պատասխանէ կ'ըսէ՝ Այո, ոչ, սպասէ՛:
6. Ամէն ժամանակ եւ ամէն տեղ կրնանք աղօթել:
7. Մեր անձերուն համար եւ ուրիշներուն համար աղօթենք:
8. Խումբին մէջ աղօթելը մեր հաւատքի կեանքը կը զօրացնէ:
9. Տէրունական աղօթքը օրինակելի աղօթքի նմոյշ մըն է:
10. Աղօթք ընելը փափաքիլ, սորվիլ եւ վարժուելու ենք:

Իւրաքանչիւր նիւթի համապատասխան, մանուկներ կ'ունենային ձեռային աշխատանքի վարժութիւններ:



Կիրակի 4 Օգոստոս, 2013-ին, առաւօտեան, եկեղեցիի քարոզի պաշտամունքի ընթացքին, Ամառնային Ս. Գրոց վարժարանը հանդէս եկաւ յատուկ յայտագիրով, ծնողներու ներկայութեան: Հանդէսին ներկայացուեցաւ հինգ շաբթուան ընթացքին գործադրուած ծրագրէն ամփոփուած հատուածներ՝ երգչախումբով, արտասանութեամբ եւ տեղեկագիրի ընթերցումով:



Հայ եկեղեցիին կեանքէն ներս հայ մանուկը միշտ գրաւեց կարեւոր տեղ: Հայ մանուկը ազգին ու եկեղեցիին զաւակն է: Եկէ՛ք միասնաբար տէր դառնանք հայ մանուկին եւ գործնապէս նպաստենք անոր ֆիզիքական թէ բարոյական, հոգեւոր թէ ազգային առողջ կազմաւորման ու դաստիարակութեան: Երբեք չմոռնանք Տէր Յիսուսի պատուէրը՝ **«Ով որ այսպիսի տղայ մը կ'ընդունի իմ անունովս, զիս կ'ընդունի»:** (Մատթ. 18:5)

Կ'աղօթենք որ բարձրեալն Աստուած Իր օրհնութեամբ խնամէ ու աճեցնէ մեր ազգին մանուկները:

